

四庫全書

集部

欽定四庫全書

見素集卷二十

明 林俊 撰

碑 墓表

重修岳武穆王精忠廟碑

乾坤復位孰從而勢之河漢為東孰從而潰之嗚呼覆
水不收長城自壞人事歟天事歟昔三叔流言天動威
以彰周公之德郊迎以歸後主委國事孔明而聽之規

有混一將星夜殞興姬絕劉天之意異也岳鄂武穆王之禍天意從可知矣慨自紹述說行羣邪蠱扇善流布滿嶺海貽有靖康金人之難二帝北狩中原失守康王卽位於南京當是時將相無足繫天下之重絕意恢復專主和議王文武忠孝聲春秋討賊大義于羣喑獨倡之時謀預機先變隨敵運用能手平劇寇志殫強敵前後數百戰無不奇捷走烏珠朱仙鎮破之金人沮喪號令不行燕之南金將密受旗榜烏珠懼欲北遁兩河忠

義嚮風焉復中原清朔漠迎還二帝一渡河間爾而速
詔班師竟出書生之所料使垂成之功墜於一旦故地
復為金有擒奸志猶未伸也重其心王父子以死弱宋
右金挾國讐以自固也彼張俊者和之宋亦和之獨何
哉嗚呼此宋之所以竟南為厓山兆也歷考名將無王
之烈亦無王之寃者古今一大憤也王相之湯陰人歿
二十有二年當孝宗立首復故爵頒封謚葬之杭州國
朝與在配享而杭相專祀付在有司其賜額相曰精忠

杭曰忠烈祀宇內者不可勝載王之伸在為之不足而
賊檜之奸筆誅口罵與王之褒頌同其無窮好事者至
樹檜剖心鑄奸像鞭之殆刑噫檜之奸未料此也邪害
正奚利哉總鎮崔公居與王鄰昭明風烈飾廟貌新之
礪堅貞屬紀王績追誦疇昔有餘慨焉辭曰於赫武穆
文豪武雄天心涅槃背報國盡忠百戰艱危經營十稔誓
復山河還軫二聖天不北宋鬼臆豺聲金牌十二煨煉
獄成地黑天昏日星載觀祀有牲醪錫有茅土奕奕新

廟風播雲輶於昭厥神率土乞靈

惠新立文公朱先生祠碑

泉之惠安故未有文公朱先生祠常熟陳侯迨以進士
來令請部使因靈女宮立焉不費而功告成亦善變爾
矣夫道正與邪也正難悟而邪顧易以惑故邪常勝正
鬼道盛而人道衰心為之不正矣君子有獨知之智獨
斷之任以自執開悟歆發之機靈女何神願使世血食
茲土為吾民厲哉然非立其本以勝之庸知不為後之

復羅池立廟在子厚人猶倡為之矧靈女鼓奸羣愚崇
奉復固其所耶本自吾道始道至夫子而盛至朱子又
盛窮造化之原達聖賢之蘊固孔氏心法也身綱常之
重以獨收繼往開來之功固孔氏家法也道大難容豐
其有以嗇其遇直俟夫來者之尊信家有其書人宗其
學以經綸大經衡量大政樹道聲儒烈於天下然後朱
子之範型無易故自婺建之鄉與夫宦寓旅寄莫不有
祠而一判同安再視漳郡往來講道於莆者屢屢惠均

過化之地而祠獨無舉其非誠闕歟斯侯之仍力承匱
塞弊絕萌植本宗儒開迷警寤以昭示民極使朱子之
道如日中天水行地曉然知所由興起焉則趣尚齊薰
蒸一相須為禮樂教化之歸雖有曲畦邪徑挽之而不
能入遡武夷匯洙泗人文昌會世風載還殆徵諸此歟
昔李繁刺虔州先新夫子廟侯先斯祠自餘悉升宜祀
黜非典政首及化古今人固相遠哉深為惠幸之乃作
迎神送神之詩曰紫氣兮融融有煒兮新宮靠崕兮朱

碧峙乾坤兮耀星日神遊兮無方儼公像兮堂堂嚴祀
兮有奕樂在懸兮几在室牲肥兮酒香神來格兮洋洋
道幟兮雲集文旆兮颺舉玄之間兮化之所孔步兮顏
趨集成兮四儒宣靈兮發響朝上征兮夕孤往

嘉義大夫南京兵部右侍郎王公墓表

弘治辛亥九月六日南京兵部右侍郎趙州王公卒事
聞上賜塋祭閣老李公賓之為神道碑少宗伯傅公曰
川為誌銘都憲史公天瑞為行狀公子壻水部主事宋

君鳳屬俊墓表嗚呼古人重知己知俊寧踰公耶勢相
忘道相下疑相商略以行一酒之旨偕乃屨板橋論別
目俊曰憲副憲副遂咽不復視默然含涕書考吹譽過
情嗚呼俊何以得是於公知己寧踰公耶公修偉異人
人重遲不戲曹文忠公物色異之妻以女治禮經領景
泰癸酉京薦甲申第進士授工科給事中充蒲藩冊封
副使遷都給事中累拜湖廣布政司右叅政右布政使
貴州左布政使進都察院右副都御史巡撫雲南兵部

之命語俊曰日者推吾良驗吾數且窮行歸故謝疏有
明農期得請之語用見已意道得微疾方禮上假寐閣
中夢張尚書為具奠若然曰夢與數符其殆弗興遂付
所侍孫慶家事付所屬檢囊具棺授以殮法不禱不藥
不亂志沐浴衣冠俟盡生宣德戊申五月五日享年六
十有四諱詔字文振別號慎齋曾祖思義祖理絳州判
官父昂封工科給事中晉寧徙趙始此妣張贈孺人子
縉義官經州庠生孫即慶曾孫儀偉墓在郡故城之南

原公樸直純整無偽行衣敝如新坐不仄作止有常伺
之恒不與一武居喪不事浮屠法趨向甚正植己甚廉
處族黨甚恩待寮吏甚公以恕藏疾匿瑕樂進人善多
識書史不專發為文慈懿皇太后服成適孟秋享太廟
公言新喪從吉非宜乃引古攝祭暨遺詔毋廢祀之文
上請裁可六科論事過直憲廟御文華官校手杖臨之
甚威衆護膚膽落公守不可神色自如抗言曰臣愚觸
忌諱犬馬之誠實惟為國上壯之怒解杖竟無害同年

于守正謫官同寅高文著病死贈賻甚至都憲原公傑
經畧荆襄舉公將事增置行都司鄖陽府縣具適機宜
璽書褒嘉遇荒先事存恤天旱禱雨時應慮囚多平反
要囚間可生道俊異其文公閱問故曰將使矜從戍減
公喜揖謝土官奴怙勢搏人死托言馬踐公主疑頗力
俊曰馬入屋勢殺豈得踐死弗從公弗懌久之得罪貫
狀亟謝曰前者執是老夫慮不及其虛懷類若此孟密
諭成悉更前政土官競襲折以禮不涉近苞苴諸夷帖

息安南為之寢謀鎮守利入裁損十七八巨掾假威福
都閫折腰弗禮公寘之法責戍桂南兩府官從褫魄斂
弗肆左璫為金寶玩具將進卒公疏明主不貴異物宜
付所司抉其寶範為金備用毋令上供滇故官不能歸
妻子多就戎募鬻為良家奴公諭諸道資以道里費得
歸甚多尚書吳公雲死節久且泯公白其事得謚忠節
與王文忠並祠昆明改額二忠公行實誌弗載公子孫
弗及知俊間知者嗚呼爭名風熾諂媚競起在敵已然

用上下下厥尤艱哉休休我公德音不忘式表公墓顯
示無疆

奉政大夫廣東按察司提學僉事宋君立齋墓
表

立齋諱端儀字孔時宋姓李唐間居後埭徙晉江又居
後埭漳州推官銑也四傳至知漣水軍邦光又十一傳
為沐陽訓導諱勸生國子助教贈禮部主事公汝勤君
主事子主事學正安州君侍安州屈其學人在郡學黃

司副汝亨鄭郎中仲璧以文自雄然考究皆不及君孫少卿志同甯同知永貞太學有名君與齊名鄉試第七人廷試六人歷禮部精膳祠祭主事主客員外郎奉政大夫廣東按察司提學僉事君仁柔恭謹色溫而氣和善開譬於法不借而事就功緒人無怨言出納禮部公廩上之至要下之則至雜易怒善謗君處之靜胡番之使倚朝貢為干請叫謹搪突不可折柔君處之又靜長貳倚信之獨不為邱瓊臺所知提學之薦出氣力過之

瓊臺死君得提學璽書行事時方募民兵求善脫者爭
謀學籍龍門新寧設學求速化者爭謀致廩貢謀倖鄉
人謀教書溷人事襲往而有君處之又靜準墨內寘而
外居若愚通慤懃述勞績於大吏與稠人廣衆爭是非
訥如也辯析疑義論人物賢否天下古今事得失如倒
囊出物事主事吳安人至孝侍疾持喪情禮懇盡尤注
意儒先割提學公費修濂溪祠進廖公子晦配享進呂
公大臨道學傳真公德秀李公道傳何公基葉公士龍

考亭淵源皆獨見也君諸生時對鄉賢策已為潘知府
舜絃所賞既釋褐位署益清畢力淹貫彭惠安公續莆
誌叅訂為多所著成書考亭淵源錄莆陽遺事莆陽舊
事偶錄莆陽科名志鄉賢考高科考宋氏族譜立齋閑
錄未成書宋行朝錄廣東通誌畧人物備志天不假年
五十五而終弘治辛酉七月也又明年塋柯宅山嗚呼
立齋不可見矣墓之銘郡新志之傳黃未軒兩著之詳
矣子元翰解元復請表墓之石嗚呼固交遊事也嘗聞

之狐溫百腋雞飮千蹠書求多聞易大畜君子以多識
綜博然乎哉文囿事區宣閱而含讎記述之難也鍾期
死伯牙絕絃匠石感獲人之亡輟斤而不運知己之不
可再也立齋蓋屢遇焉世自有不死立齋何悲

明尚義官山沁陳公止庵墓表

山沁之陳自寶謨閣待制公次升宣義公次顏兄弟起
元祐間危論直槩為時名臣慶基既啓胤祚世以昌襲
儉似賢率不墜名家風素居以厚羸入國朝四鄉腴田

半焉大役興財力之征重戶槩不可支家無脫丁荒業
遍平楚陳於是中微宣義葉孫承事郎公公逋山積縲
囚幽繫鮒涸而蝸枯身世重若籠鳥晚歲始舉止庵公
當鍾愛之際顛落摧沮之餘望成立奚有哉止庵銳往
超悟拊髀思奮不數歲逋告完田之荒漸以治失漸復
而有焉正統間我英宗念民罹寇復其租三年陳復獨
多擅有完利止庵相承事公於外配林氏相姑於內拮
据節縮勞瘁窮日力於是荒盡治而失亦以盡復歲別

項畝為常郡之富遂顯陳氏迺新祠宇營居室取完與固不施鏤藻又因饑為輸粟先承事次及身次及其子又備貸本千石於鄉時其散斂中易如常平最後續以田四百畝之入則所謂義倉義庄者橋道之修重費不吝請棺請藥衣米婚嫁之求亦往往而副時同里大姓鄭必謙並以行義重鄉評止庵尤韜晦濡迹樸鈍不欲一厘異上人身無綺衣口不言財叩之笑不答譽則不居有犯則唯唯然退對客危坐無大語質曲直一言而

定無不服者諸子頗飾池館非款客不復賞視或疑不
識清致止庵曰汝祖更不識蓋訓儉也諱儼字德威曾
祖嗣祖恕父即承事公諱卿母張氏子國子生景賢尚
義官景陰陽訓術景福景山景員孫在芹在橋在舉
生正統癸亥九月卒弘治辛酉正月墓卜大蜚山既塋
景賢以侍御陳君希周之狀請表墓道之石嗚呼成立
之難登天然高門落以復起又難也止庵若誠易盆盎
盈溢止庵若虛焉廉施自許借一官頗為民厲止庵僅

處士有逮人之澤焉史稱太丘在鄉閭平心率物行成於身而道訓天下宗風淵軌其殆然乎太丘二方承則羣仕魏為司空止庵諸子有劣視二方諸孫有絕羣而上者乎其無蹈慚卿慚長之議矣嗚呼古今似續難矣哉表出之以并告在後

明進亞中大夫致四川按察司副使事東山黃
公易齋阡表

易齋黃公熒敦實既營樂邱自誌之又屬意其友林俊

表焉嗚呼是俗所深諱而不欲言者况豫之耶夫生寄
死歸達者所易視而諱者未之竟免也死生亦大矣任
情死生於仕止得喪何如耶公初以成化壬辰進士尹
玉山起為南京監察御史偃俸抑抑巽下予意新臺官
過矯屈為是何也公先丁御史南澗憂服除改北臺三
奉璽書巡長蘆鹺司迤北漕道四川雲南貴州戎政酬
接聞都周詳商略無徑斷語私服充養之素官六察殆
非宜然也既之偽者奪燥者息陰賊慘狠而激訐者消

沮聲迹泯然事緩急竒辨固有以孚而移之前後論列
事為多官賢否治得失十餘事尤荷我孝宗敬皇帝嘉
納公固不察察人細過固持其大也在雲南有趙都司
晟者驕悍不可馴獨帖帖憚公巨璫遺財當事者避餘
烈公從容一語覈其數非剛而善用能之乎夫豎目張
聲嚼齒大罵凜然若生風臨小利害輒隱忍循默猶自
謂老成得重厚體然乎哉予親見公南臺及雲貴時事
道玉山又得公之流澤故政嗚呼今之官如傳舍謂一

令三十年猶有存記如許耶公為四川按察副使能望
隆起顯叙方有階入賀過家拜母林太孺人眠食無異
然已八十而九公曰自惡而致其情哉遂疏致其事所
以致悅太孺人者織巨曲至又四年太孺人年九十二
方終公擗踊欲絕是日烏百數遶屋悲鳴不謂事適爾
如是公善事前母兄友于二弟教子琳瑯琛孫某某曾
孫某皆士業琳詔誥皆郡庠生念顧孺人同甘苦既卒
竟不復娶惟側室栢氏自隨今遷顧以合預祔栢之位

其兆因南澗之東址所謂高士岡者初正統庚申太孺人夢虛空中紫衣人呼授以物以衣承之得鶴雖是歲臘月十有八日生公鑒形者謂之鶴相冠帶衣履書畫百物精緻虔潔居宇絕一塵既老樂五松號五松居士人謂得鶴之性搏空聞天大槩近之而躋高詣極鶴之類率不能齊獨公乎哉表曰百羽品流鶴居鳳凰之次聖人在位鶴與鳳凰翔於甸蓋清也而亦時也羣鳥宜無及焉易齋明心藻質舒斂自由不黜黜於羣污以超

乎羣物之上嗚呼觀夫動則賢可知矣

明中奉大夫廣西右布政使拙菴伍公墓表

正德辛未卒廣藩右轄拙菴公也子符亦右轄湖南留
侍未赴得自盡於公碑銘二筆得吾師少師西涯翁吾
友少宰圭峰翁二翁名宗工良副矣左轄吾閩又屬俊
表其墓嗚呼其無已足心乎公諱希淵字孟賢伍出安
成顯姓安成擅春秋伍尤正傳公在諸生與羣從僉憲
君希閔號雙壁天順癸未公會試禮部名第四程式之文

無涉艾潤名一日震京師傳置之天下為奇歷刑部屬
子辱尾公後繙閱舊牘法比精練公獨先輩人英抱直
槩同官能道者部之大獄兩畿之大獄浙之慮囚皆擇
能授公公當輒平為司寇諸老鑒賞薦臺憲薦廷尉丞
坐與審錄貴臣爭是非陽雖公屈而竟行其中同知廣
州清戎多襲具文公搜摘弊隱二十事中具首祭御史
行其式為式郡事屬公寬伸滯流費省而諠以寂有無
公不成府之謠分捕山後劇賊謀預機先與陶察使魯

功為埒部知廣之宜公也擢為其府知府臨人出政預
有以塞其利孔清其弊源布行其寬大以基教化宜其
下以孚乎其之上人官能連旌憲使藩叅連薦廣士民
在京師者羣然誦所欲留部知廣之果宜公也擢為其
藩叅政令行於百越嶺海之間人人指為鉅人長德左
官放臣恃若地主若疾得醫風雨得大厦以庇姻族鄉
聚之施亦然立弟之孤祿之入至委而盡獨不事嬖佞
規規然校禮柄人觸忌諱既遷廣西右布政使念父員

外翁春秋高紆道省牀下因得以視藥視斂視莖以自盡於翁及其劉氏繼母喪既除遂無四方之志而符亦進士累如公官鄉以為難公亦為之私慰嗚呼外藩之重至方伯而極矣昔柳公綽與子仲郢並節度使公同也公綽善事繼母又同柳取進士四人伍八人公及符及正郎全祖孫三世柳其或少也仲郢及玘之到將無同乎伍自御史翁冕負外翁體祥德厚開先公世引之柳根葉之論殆然至謂孝友敬忠食之醯醬伍無一日

無墓田雲物固有席津潤而被龍光者矣表以并俟之

明上林處士梅竹墓表

自予始識事及見鄉先生長老退讓樸醇禮益恭言呐
呐若不出諸其口運猷準物迂緩若難副而竟揆諸理
以合族祖學士贈侍郎公澹軒允渾晦學者稱上林先
生子處士贈知縣公軒居然風素予謁侍郎公道遇知
縣公退未嘗不發愧也嗣是風漸異上林子姓猶善循
襲梅竹公又尤也予還往群從中比見公退又未嘗不

發愧也方知縣公侍翰林公獨身留家髮未總已善酬
酢内外事事祖母淑人劉淑人鄒敬順無違友其弟錦
衣經歷釗相和應掖道成學以掇取鄉科侍郎公既請
老知縣齒亦就衰妣達孺人亦喪明公日任兩公之勞
偕配李孺人相達之作止却疾扶衰檢方而伺脈岐黃
之學為精姻舊屈致與窶賤而授方餌良効雖無屑自
見惠在人多兩公與達先後厭世治喪一如禮營鳳凰
岡之賜葬安田洋之墓勤悴連三數年季弟鏗幼孤擇

之師周視其成情今與伯子潛齊聲郡庠仲子渠錦衣
子希範同取鄉科為州守郡倅渠今後叔弟鉉孫甘棠
常棣喬木有梅前後輝映家學世範數百年公猶視若
單族抑抑斂畏學取繕性以護養淳源睦周親而薰晉
鄙詩祖唐書祖晉篆隸祖秦而皆有所似粹謹之譽無
間戚疎為郡伯蔣公雲漢王公弼獨賞蔣既方伯猶紆
藩駕巡按宗公彞列篤行五人公第二其循尚義其殆
非其志也故猶曰處士處士諱鑰字與慎吾林九牧端

州二十一世孫於予為族父行素清羸在相法宜不為
壽猶歷正德庚午年六十七以終潛既治藏知縣之右
以舅氏大理寺丞李公長源之狀請表固有道碑也文
曰戢采斂曜含虛若無器車山隱名劬迹孤復命於完
世機消息伊梓伊橋玄堂對寂繁仁者壽粵作非相
靈慶伊縣玉枝雲上

明文林郎錦衣經歷四雨林公墓表

侍郎澹軒公之再起林氏也以敏特取大科以純永收

物望被簡知而涉華要經緯一機章采無易贈知縣拙
菴公猶澹軒也梅竹四雨之伯仲猶則拙菴也四雨秀
眉玉色神鑒整朗動人年二十一上第於鄉蹶禮部之
收者數四始就吏部試知縣金華日綜民政導人以禮
祠何王金許四先生處其祀事賢問宣流用被有旌命
拙菴如其官毋達配郭配黃皆孺人公尋有錦衣經歷
之授緩苦澤燥利導其媿沮朽要德助已為多力勉為
之受恬席有所殺其故然猶坐是滯留弘治乙丑壽五

十八以卒後之乙亥黃六十五亦卒公居常善晦有曲處無薄施禮卑言擇恐恐然墮素風干清議以汚前似其固有畏也昔范蜀公之孫祖禹著唐鑑王獻之之書得右軍筆法公四雨集通鑑餘錄頗視澹軒而書格酷與拙菴為類型治世觀之下崛起殆有間者郭世早黃似郭而賢二子郡判希範又賢希教達而敏孫曾梧竹九牧端州之世將復始於茲矣作室家者基固而築之密時其葺治世世存可也奚賴崇巨觀而隘前式抑久

而後大物理有固然者澹軒諱文拙菴諱軒公釗諱汝
度其字其墓先諭德左次表曰瀨故卜石龜食繫四雨
嗣雙壁呼曾孫並立宅神光離離斗千尺

故中順大夫桂林知府方公墓表

三峯之陽省菴墓在焉公從子給事向請表墓道之石
給事賢者狀可信無疑也序其要曰公明伏氏經正統
丁卯領鄉薦後十年登進士拜監察御史河間盜殺縣
主簿公設竒縛之羣盜散按陝尋按浙釋奸剔穢聰察

若神明齟司牢盆之利盡歸公府請者無分寸得啣之
甲申按廣西苗窺桂林城守告急公用虞詡計悉兵民出
南門入東門買甲易械旋轉數周苗錯愕走公身授機
畧且撫且捕因陳弭盜數事奏謫巡撫一人方面而下
罰有差丙戌代還邊二人坐虜逸歸邏者得之主將倖
功文致死獄中貴人視行刑公廉其寃業已上奏因與
為異同貴人怒訴公陵侮不奉詔會銜者柄用因為竒
請遂知攸縣至輒求生人利害廢置所宜令出輒稱便

道歌十奇巡撫累章薦顯用銜者率格不行比六年始擢桂林知府蓋舊經按地陰置之也在郡而理八閱月移病歸歸十二年癸卯年六十六乃卒公勤儉孝友孤厲而貞方鄉薦時已永感慟念劬勞忽自失墮馬下總功同爨無間言官費時家取給不禁幸進不辱義退信道直前迎刃而解故所嚮騰聲或謂有閔道之庶孟博之介稚子之神元亮之高其伏其起其歸也朝士屬人咸慕頌焉其沒也其吊者咸哀焉諱佑字廷輔方連世

有人桐城自廣信四徙德益五傳至斷事諱法公祖也
父諱懋贈監察御史母許配吳皆孺人吳後八年亦卒
祔公封兄弟五人長陰陽訓術次文林郎次公次給事
父也封工科給事中季鄉貢進士子隆娶姚女適錢鸞
吳希德孫男淑淑詞曰憲憲元老惟周卿士授鉞秉旄
式允文武有美來葉耀休於同洵美且仁夙亢其宗於
赫省菴山立淵靚措枉釋回臺章載整攸介萬山盜紛
若麻豪虬其結吏斷其牙自公來止乃滌乃汰威之庸

之金範瓦解爰有饗錢月省百千衆曰紆哉惟太守賢
喧囂脫遺柴桑攸宅靈修孔承美奕奕獲奕奕三峯其
下玄堂名壽無疆公曷云亡

明閩三山袁節婦林氏墓表

關雎興淑女栢舟以興貞婦夫命物不齊得意失意永
畢永訖道有相成者而身以是始亦以是終靡他之夫
其不可易也夫然後天下之為女婦者定剛節厲操與
貞士同其義烈並書礪世也三山袁節婦林氏諱天在

諸女羣誼獨寂女事無教而能父處士某曰靜母陳曰
慧固女質女性哉歸于袁茂才臻則夫也有所承無所
專應對升降姑劉之所茂才曰順劉曰習固婦德婦儀
哉而縲車芑莒職其常事舅處士澤曰匆匆固婦功哉
天順辛巳茂才疾亟節婦始二十七歲乳下英未易齒
黃氏女甫晬茂才意若有屬節婦曰無憂有若此日遂
瞑自是謝去膏沐食老而字幼哭聲時不忍聞隣嫗微
挑厲叱諸父叅政公迪曰姪志堅堅婦節哉既四年姑

卒又八年舅卒又幾年歸英婦余氏生貞生達余又卒
鞠二孤孫乎長為歸貞于曾納達婦鄭於袁凡喪墓門
戶乎支虛茂才某山某位之右以從節婦法得旌有司
請旌節婦曰旌費兒辭節婦雖愛達必教與俱遂領正
德癸酉鄉薦甲戌第一科教諭青田方業有後舉拔尹
貴溪時壻黃氏用亦倅連州黃氏女偕達請迎節婦曰
從達既至稽校廉惠以必樹聲稱而慰意超起二曾孫
二曾孫女良勤正德庚辰壽八十六以卒英哭曰母辭

旌以袁貧也自何致所不朽言已大哭哭致毀達哭亦致毀於是丐黃編修初傳費少保閣老公誌銘屬表於我雲庄嗚呼貞風弗嗣易志以移所天獨女婦然哉而綫脈復續右門落以復起不有節婦能袁耶不有節婦能世耶表曰三山袁節婦之墓

明贈戶部主事羅菊泉墓表

儒與醫同仁而異用然計其所始迂緩殆不若迅速之副人意成化間羅菊泉翁士亨與其子伯氏典儀正練

以醫名起江夏間凡縉紳韋布名商巨賈下逮耕夫之
賤鄰邑之望家世姓疾必致翁父子翁父子治往往効
翁主正練間出之以奇弘治更元鄂饑大疫巡撫都憲
梁公物翁名致之施藥給粥存活甚多酬以利辭以訓
科薦又辭予在湖臬翁是時公府屬之練而自應遠近
之求酬無所較而益居於羸日率酬十許金證奇酬至
再倍家遂起子孫振振然盛翁曰家僅少儒致經師諸
子教之稽其勤惰擇之友以資其允澤數歲仲氏采國

子生叔氏鏜鄉進士李氏英進士為戶部主事員外郎
中贈翁戶部主事配陳封太安人孫賢世其醫雲鄉進
士霽霽寔寔皆士業技不醫廢而竟儒以並來効如執
左券以徑索茫昧者之酬善之利滋以博矣翁諱本通
士亨字菊泉別號也先三河人祖冕隱於豔父顯祖起
太豔吏目使楚以老以占籍江夏翁儒醫並治而竟醫
乎精孝於家睦於鄉不為蠟言脂貌以取愛信郡鄉飲
行禮致大賓正德丙寅壽七十二以卒明年墓夜泊山

之陽陳邑處士瑄之女少翁十歲能共勤儉起有家治
內肅若公府家人有嚴君焉戊寅壽七十六亦卒祔翁
以合嗚呼醫仁術也禮三世服其藥慎也羅之醫三世
而大行於翁之父子醫行仁亦行也市不為市之道醫
不擇報殆所謂取利遠故大者而儒該之醫之澤重遠
以大所謂醫國者又殆然乎儒之用道猶醫之用術辨
脈審證惟恐藥弗中以為術累嗚呼今之儒有醫之心
乎予為翁子孫願之事有微而著隱而章木始於芽藥

而終於繁蔚致之者根也羅嗣植哉表曰是為明贈戶部主事羅菊泉翁之墓


明長樂知縣黃公廷美墓表

黃長樂公龍岡之墓及是二十有七年孫太史君請表其墓曰先府君痛先祖之絀令也自淹學籍以老若意屬於佐曰念之終汝祖之志墓未表也曰念之終予之志佐謹從事以假靈於公子老不受役太史君子畏也慨陽德弗剛士趨日下烈男子幾人公方中直槩無取

夫近局之似曰我道當云云景泰丙子舉於鄉再就禮部試弗偶居太學上正身正家六事語涉佞倖忤英廟旨賴王忠肅公默護和者同聲公亦力取自副薛司徒遣子就學試吏部與御史選也不色喜中以落也亦不色愠知縣長樂曰吾鄉人莅鄉人先化而後進之兄弟有訟諭之讓盧公林劇盜諭之從良而皆有所信招徠流人洗刷冤滯修樹羣廢而亟其廟學之遷輔公廩焉吳守繹思屬鄰邑之訟當輒平以取愛信公益令責自

效鄉之豪殺人匿其屍訊不詞服當道欲從疑釋公請
自訊忽螽斯折左股斃研池中公曰汝折其左股斃黑
水池新驚服得屍水中猶為終訟連及新棄市公能益
章部使者業有所薦亟引而還曰吾倔強可終制耶羣
留之不可立其生祠道黃土嶺公林親肩公輿過嶺剛
則能感子產惠人非歟配大纜李氏懿而烈嘗偕公舟
江水暴至亟走岸岸不可攀舟子手為援曰吾溺也可
劑量時公乎承伯叔之居之讓仁孤姪力焉公卒弘治

丁巳壽七十二後十年李卒壽七十五合附聚龍岡以
墓黃出宋度支員外郎漢卿之裔元宣慰使從簡自筠
州來徙南海西濠傳教傳溫德香山徙也傳泗傳公會
城徙也諱瑜字廷美英穎嗜學居閒述作體重有所似
趙僉憲叙之集子曰畿曰廣公之學授畿弗售授太史
君輒售淹速有時然者抑絀久而伸足信天於是乎定
君子盡我以善事天也表曰是謂黃長樂公廷美之墓



見素集卷二十

欽定四庫全書

集部
見素集卷二十一

詳校官中書臣瞿照

中書臣劉源溥覆勘

覆校官中書臣汪學金

校對官助教臣蔡鎮

騰錄監生臣丁緯

騰錄監生臣鄧洪繼

欽定四庫全書

見素集卷二十一

書

一 荅韓貫道侍郎

辱賜存問且責以病告之非捧誦倍增感愧今之海內
知者如先生虛懷忘勢休休樂善如先生可多得耶後
恒之戒後亦孰知然遇大君子亦思一盡焉見素立號

明 林俊 撰

在滇已奉告湖南獻論亦屢矣想荷存憶則固非一蚊
虻之故為仕止輕重也夫覆水堂坳之上芥為之舟置
杯焉則膠後堂坳水也高官大爵杯也則亦奚勝任哉
自惟無似行已許國恒竊企古人若是非毀譽無一介
於中則風斯下昔朱紫陽累辭召命立朝不滿四十日
尚招譴譖不自聊賴猥如俊者又可知矣志荒學淺實
小而名過浮左覆右掩貪造化之福免時俗之憎亦愧
且勞矣家食頗眾草堂之力親隣別墅時得共娛養親

教子人間大樂事敦俗裨化大凡也伏祈成就使尾遺
逸之塵不蹈滿覆之戒則惠俊大矣東山不敢作書乞
道下臆

奉謝木齋國老

俊無類辱三書惠又聞時錄賤名字具數中得告溫音
實荷調幹非誠狂惑喪心之人又惡為是默默也俊嚮
往名賢出其性今之賢有過閣下者乎樂道盡己不責
知報有過閣下者乎然不修謝有由矣賦稟狷狹敵己

以下自謂無嫌則通懷接納至於尊要之賢惟恐交私以玷完德故門下無其跡笈笥無其書然而頌願之私要非翕翕所及者則又敢獨破宿戒以上污大君子於今則不得不然者士夫行止終身大節非閣下孰裁而聽之俊德非素養性多健忘學故荒而才誠不適時用徒以直突誤竊虛聲取物忌亦不為少矣忌若不勝誤知之衆然誤知之泛卒不勝忌者之毒以專厥亦無甚可畏歟平生以韓見素出處自期竟阻家寒瀕辱乃請

固酬宿志尤欲以供養二親也今復違親以出胡為者
耶鍾南之捷人非何謝違親已非孝又何取以移以仰
報吾聖天子眷遇之恩副宰執士夫之知之望哉謹疏
上請伏垂憐右得遂下懷使免再舉取矯激之譏則生
死肉骨恩何有極無任勤懇

寄韓侍郎

俊迂僻才不用宜而事頗拂人意收身岩穴甘木石為
徒辱牋教以所不可復今有是差付亦何誤知之深而

不忘疎賤之至也市帚可憎得馬不為福家居卧一小
園不與人賀問慰弔城府之迹曠以久豈復有較纖末
同異於鄉者哉忌者猶騰其口受德者猶下之石間相
親慕則羶沮而咻之其所置涇渭珠璞其間者率皆細
氓末位言不足上聞聲望不足重當世則雖多奚補哉
由是而推之由是而度之則某之不足齒顯仕之途亦
故矣固非樂是幽獨以甘自棄外明時也邊候聞警固
非卧貼席之時也攜二小僕就道事妥方敢言私隆寒

惟為道保重不具

寄馮少傅

俊不幸有疎直名時觸憎忌顧獨被愛私位穹勢懸不
敢通謝水軍之委涯分豈堪然邊候方警義當一行要
不久於其職者不於此為閣下告懼無其日矣今所謂
名德耆臣繫國家安危華夷輕重者有不曰少傅司馬
公者乎孰嗣公有不難其人者乎今檄書旁午大同至
延綏至使宣府偏頭諸處又至將無可倚而財日不給

於用閣下為聖天子獨當其憂旁觀卻視宜有可訶者
俊竊觀之閣下之精忠卓識自有餘力寅僚又表表可
諉付然自古謀國固不以材多為嫌也昔成子薦子夏
子方蕭何薦韓信師德薦仁傑仁傑亦薦東之皆能底
治平樹有不烈管子不親薦賢桓之業衰竊見劉東山
謹潔粹敏蚤出職方熟閑邊略閣下誠開共濟之深懷
舉同升之故事引之近地並位司馬以叅畫機宜張主
國是夫然後擇所大議論與天子商可否而繼以去就

爭之則閣下之德業韓范數君子下風矣夫惟閣下可以聞此言惟俊可以此言進謹撰詩四章附致下忱無任隕越俊再拜

復李仲易

承手翰及山齋書教辭旨甚忠波流風靡之中又得足下數君子以出深用自慶亦深為吾莆一喜也朋友相規道喪久矣又安望身見之今哉感感慰慰然所謂歸省者傳或未真而責以言者則又或過也僕非能大臣

者即大臣因事納忠則有之必摘所難能之事逆耳不可聽之言立竒命惟以釣取聲稱知理道者似未當是也夫不在多言不得已而有言不在必去亦必有詞而後去今天變如此敵情如此十金之產之家尚以單傳為懼況官家耶則大可思者又如此二親年踰七旬曉露晨星夢寐驚悚則所私抑又如此語默去就大機軸也今之士夫方石東山亦至矣聖天子隆遇亦加數等矣近所論列所推薦人亦云云豈人論難諧抑亦有責

以如僕者故倉卒成事耶二公如是僕又可知矣其出以部檄速就道辭起右轄辭今中丞又辭則若過者況其秩顧卑若涉不屑邊陲方警若涉不自安詔旨臨門又若涉不可不起古之人所以累辭徵聘則山林道德高行之士非僕溷溷委質者可同也則其欲歸之意固在夫起之先矣慮囚方困俟不久面論古人心事吾契勉之固非所甚難而亦未易視為至也嗣是有聞毋惜惠告僕亦當足下屢盡焉不一

寄韓少宰

遠蒙致書附以西帕眷意甚厚日來諒道體冲和某在此
此缺遣第既返故樓復就新命或未免假退求進之嫌
既辭右轄又就中丞又未免輕外重內之議況二親年
老情自難堪而生之處世又公素知其初志亦公素悉
也朱紫陽謂使世亦知有不好官爵之人生雖不敢嗣
末響然宿性疎率視是亦輕而蚤歲不學亦將是少償
也本期邊候停妄言私而越職妄言事義當並舉伏望

全成則所以惠某者多矣不具

東楊碧川

昨與二生族與韶故人子相論坐監之窮二生言鈞有
陳偉者抄文鬻米子拾野菜和為粥渾家日二食或至
斷烟火仰天長嗑對人無可憐之色蓋正獻後故往來
二生云固亦未之識也愀然問以處之則廂房無苦差
之及猶優耳遂用奉告不須使其人知也昨東議奏事
條何如此正闕局毋勞辭謝拙稿希塗抹不具

答林太宰先生

承諭訪盧錦蜀人鮮有知者又屬李侍御旁求得之要亦恐入山不深安時命不苟求聞達者不然其直聲寬狀同年同鄉可了也是亦可窺其素者矣錦在京師惟讀書靜坐所交惟貞伯靜夫廷章數人亦不見其密也與為三原王公所重為進士為主事皆有論列明指台鉉左鐺故以公杖特免才不深知其簡靜醇古論中諸賢不及也碧川固未知耳謹告

東楊碧川

昨會議題奏竊意近時旗竿出火火光如斗燒人畜軍
器天鼓長鳴俱須增入取宸聽又謂是固可憂而豫緩
亡畏尤可憂方剴切事條內增伯常司徒廷璧世隆都
憲當起用楊茂元同知曹璘御史可三邊兩廣兵備知
府用為民盧錦主事劉槩知州可國子博士用庶此奏
不孤而此輩人亦須此大舉望收錄耳希與太宰先生
商議勿置嫌迹至望

寄何少司寇廷秀

不奉趨走者三年閣下職尊而地禁徬徨荷罪之人不敢輕率通姓名以黜汙完德感仰之私則固心藏而日識之矣近涼寅惟道況休裕碩人禎幹而居久未調物論益歸俊無謂嘗自幸獲事大夫之賢以沾溉膏馥萬一不意復自棄外庸劣益增誠不敢以蹈引自高容容尸竊夫足險途則將無及矣此惟敢為高明告也南失刑已極阮上黨至始大更張政體已駸駸乎北矣公質

直而行夷心公而氣壯連抱之材恐非斗室可奄若晉
其秩仍其事其豈小補哉生復有薦焉職方正郎李應
禎植志精純問學該博作述書法時無為比而進取益
澹副郎十二年在官不滿四歲擢署正郎不欲隨例乞
真年垂六十未有子無廬以居馬以乘坦坦不掛念慮
宛然古人風素而與世齟齬吏事雖舉非其長竊惟有
道之世如斯之人豈可使老死郎署而已耶今南之尚
寶鴻臚俗號冷職他途者尚得以居若用斯人不度越

尋常萬萬耶閣下宗重人材赤心在國故敢僭及倘蒙
薦引亦盛德中事也未及而言無任惶惑俟罪之至

寄陳志學太守

坊牌過蒙紆念感當何如然嘗陳訴鄙愚乞惠停免想
已奉徹視司矣近傳移寒家聯桂坊故址為之令人骨
疎賤兄弟不能體悉不欲立坊之意又不能奉白古坊
創建之由致蒙誤愛特恩而垂察未暇也古坊宋元間
九世八世七世宗薄與子知縣二祖親事復齋瓜山傳

考亭之學其後父子同登進士第知州祖與同知叔祖亦以氣節文行耀聞聯登進士第當時避之為樹此坊盖三百年故物城中僅此也規制簡野不列姓名具見作者之心而相仍修飾甚廉以易晨啓夜閉賊盜不敢窺甚利也寒門姻婭之帖市易之券交親通問之柬紀墓之碑必曰聯桂聯桂是與鳴珂冠盖君子通德何異今以無謂之故崇新觀泯舊迹使列祖數百年之洪名顯德因生而殞義萬不可而心亦萬不自安也况棲止

無地顧先辦此亦大非常次矣伏望俯順下懷止於未
事即業已乞力正之復舊坊以存林之故移新坊以為
作興進士之用則兩得矣義激情至罔知衝突無任俟
罪

寄馬鈞陽

耆碩元僚進專銓鏡列聖所貽聖天子所授以掄輸官
材殿邦治而創理太平者也毛玠山濤人流領袖系表
率者誠多而所望於收拾者亦不為少矣俊未嘗侍門

下顧荷誤知不才姓名久處夾袋未越半歲薦稿三登
釋未彈冠是其日也顧求去若數數然誠耶偽耶激耶
疏亦可以觀矣俊愚不自料嘗思古人於今人明公固
其一也昔淵明學諸葛亮晚更字元亮夫亮一心漢室
竭忠悴殞星乃已淵明八十日縣令即解印綬歸柴桑
其出處大不相類其學亮斷不自疑後世亦無以為非
而恠焉然則容知俊之去非誠學公者耶乞山十二律
重見底裏錄納洪洞公取閱自可憐念俊去意非一日

所以百心君相者欲遂此志以無害為陶無害學公無
負天下耳非默致所求於公心口相異假退而求之進
者也鹽車之驥仰知己而鳴是容泛泛告耶望憫其誠
不疑其偽且激以成俊之志終公之惠使山林廊廟均
為有人無亦美耶洛陽公少宰二公倘復見沮乞及此
決不宣

與大司徒呂先生

日者猥撰二疏曲荷扶攜江西之民怙冒聖天子大德

亦豈敢忘被服尊公之功哉瑞撫諸盜多罷吏久書里
老教學溫戶養子之流與他地率迫貧寒不類仰伏皇
威哀止且半歲又不知嗣是何如也春夏間饑民羣起
尤可畏大荒必不可撲遏思所處之無過常平公為國
預處則江湖之間盡蒙公之食矣伏熱惟為道保嗇茂
膺繁寵不具

與松厓戴都憲

風紀叢沓之餘不謝勞勩不忘批荅不以晚生末進異

地加畧裕才雅德誰則如之慰戀慰戀辭疏未蒙允文
物大藩誠非生所堪折足覆餗易有明戒生其母過量
慮耶奉旨推勘事增一難題然惟至公以仰報君父威
福惟辟聽之命而已事有乖梗萬勿吝教固百志於公
也明且發撫州毒熱重不可耐然事不可了將如之何
不一

與謝方石先生

承示大篇不揆和荅我先生之峻節貞風望朝廷歆視

夷夏而竦聞於世世詩固其餘者耳泰山喬嶽自爾巨
瞻而俊特部婁其下古栢長松風爭雨鬪抗冰雪而烟
靄以伍老態逸韻飄脫天至而某以弱蘿襍薦叅附其
間無亦大不自量耶然山宜無憎於部婁而摩空之木
亦蘿薦之所樂附也兀兀以老文字重不識為歸嘗觀
名世立言心為之體氣為之佐盡讀天下書窮古今理
低昂事物之變以豐所蘊而大肆厥詞玄機獨運衆皴
前陳某萬無一焉詩不過押韻文僅僅掇拾成篇章而

已近廢於憂舊殖益落重若不可舉筆前者之稿雖五十許卷亦僅醬瓿上物謬記潛溪於歐陽承旨為晚輩而王烏傷亦後潛溪序潛溪實出承旨而烏傷之文潛溪實序之某非敢妄意前輩先生則承旨潛溪為儔某私欲聽教下風不知可得也鄉居未暇稽校又無力錄呈然先生之知某又不待於此得序或題數語某雖老將循以自進焉

寄徐大叅廣賢

仄聞榮轉石鼓景鐘重可鎮國售之市無顧者是可知
寶賀矣人便書致吾道一快不具

荅黃都運

承示二大作桑樞蘿屋而粉垣朱闕繡拱而文棹以借
重於外坊意有探其中以失笑者感愧感愧執事才名
二十年年盛而志愈專固宜是製泉山翁老梓人也踰
八之壽又居車馬輻輳之區左迎右接盛夏衣不及解
帶餘情副此而雄氣不衰鏗永而有餘韻豈金精出世

而然求之古蓋不可一二指屈也何可當何可當幸代致再四謝意不具

荅文徵明

先大夫先淑人碑銘承不鄙書篆近又拜壽文之辱因親以及親之與吾契之微也感慰感慰自辭今先郡伯之賻曰叔世有是王戎因為之矣古文字之高曰書生有是元賓因為之矣書畫之美曰餘力有是蘓文忠趙文敏因為之矣僖弟脩道峻節孤風使人傾懷注臆有

不可及之嘆私恠經義策士徒求之繩墨寸寸之間不足致磊落竒偉之材而吾契之宛珠傅璣又非循常肉眼之所易識吳文定公亦坐是久之而竟大遇則足連城均是物也然以相告淺矣矧相待耶吾人盡在我至舉世無知後世亦無知吾之道無損益也自愛自愛人便謹此申謝臆且附私懷不具

荅彭美中

道甫承以氣味涉似傾寫如故識取正求益是何相信

之過而自貶之深也先大夫碑石又承遙致兼惠土物
銘感何可忘拙詩選未畢稿魯魚未讐校俟遲錄奉也
閩地震頗異恐兵荒作耗收人心而固結之賢者之先
豫尤世臣家宜圖者餘惟保愛萬萬

荅方松厓

承問禮杖不杖之異古者父服三年母期今制皆三年
以齊衰為殺耳問喪父在則母不敢杖尊者在故也杖
輔病也喪服四制婦人童子不杖不能病也又雜記童

子不杖夫為妻父母在不杖不稽顙母在不稽顙今制亦父母在不杖喪服小記婦之喪虞卒哭夫若子主之祔則舅主之令郎宜期而不杖不稽顙禮不以婦賢加也喪亦令郎主之至祔則執事主之似與禮合草率奉荅幸再詳吾人於禮鄉國之所共觀也不具

寄陳大叅唐憲副

恭喜元擴就馴於節鉞之下兵革不試財不費而事安人安泉無岡玉之焚莆亦與有席貼之庇運猷布策二

先生誰及哉慰喜欲躍宸顏動色將有懋酬元功者矣
私幸漳亦如此胡公有謀勇幹濟兵聞久候春深恐霧
雨難舉事嚮道要得人要擇戰地防設伏戒退縮輕進
戒妄殺寓至仁於至義之中斯王者之師天之所相也
大才自有處恭俟佳報人回先此奉賀不具

荅費東湖閣老

某齒衰學廢惟雲水一念未忘常思飲武夷自潤冀公
得偕繼亦有迹禁之悔下教果然匏繫阻越兩地心悵

也紳簪何物既謝猶拘忌若此十四年契濶無復一把
臂時矣去歲達子業候拜以藩府事嫌取道江山令人
短氣自今惟夢中聚晤爾矣至樂樓委記寶井發祥恐
土丹無分而正一火居故諶諒尚存記聞客使其多仙
鄉實瀕孔道風而來者以道範卜世無恠其然泉山翁
會城尤苦某未能盡省去然鷓巢量身尊客少留留不
出五常豆熟者三豆間以二菜易續也价回草草奉荅
惟為道寶愛不具

見素集卷二十一

欽定四庫全書卷

見素集卷二十二

明 林俊 撰

書

復王曰良憲長

承惠教及致二泉書仰知執事遠有源緒樹廉汰濁使
吏墨一洗公之壺無所宿萬目炯炯焉閩長臬自肯藩
來者馬鈞陽高鍾秀亦次之執事尋溫舊學具二泉之

體以大發二公之施勲聲所及殆踵二公且立乎其右位遇之小小未足言也人回謹此附賀餘惟寶愛萬萬

答姚東泉方伯

前楊都閩舍人回附書想達日來聞伍公入覲未審出本懷抑未然執事任之望實兼隆行且擔荷天下事凡便利必縮己先人匪但先之且一付之大艱阻患害必引歸之我無難死之而無悔庶大賢以上作用以力挽古風固不在泛泛炫才猷取位遇而已也區區平生守

此以定川中軍前功則歸人過則歸已道義交親眼中
執事者敢咨告耶先大夫墓碑松厓嘗屬舊寅未見消
息昨守仁舍姪轉托衢守任甚力繼寄聲謂由大關亦
難致恐惑江令推詞抑誠重也由鄞覓溫船由海較易
執事無憚為力或假胡振之先生或相知為力祈在必
致區區道不孝之罪僅此也餘惟保愛萬萬

復黃都運

承翰教意懶而詞工及近覩集中數序日進老蒼而健

雄雋永古名家奚異前者讓地今甘下低頭之拜矣執事質素美年力富強而加以信好之篤又惡不至哉政聲廉問東來甚韙有體有用有文此全品也世道幸賴焉加愛加愛承諭葉郡伯光大廉整素聞深企而慕之第不欲數數通書以林居格例未由輕易也會中幸致是意區區近銷削德不加進而文思衰落益重二賢之好而時邁之慚也陳時周尚未舉子近患目幾盲天於大賢困薄之若此不具

復王曰良

承過獎借及推衣繼勤一臂未由膺腑相信執事知己
吾二泉宜及屋烏之愛也感感僭有私論蒲一掌平田
餘皆山斜鱗次用力加而收効少自辛未失收徵租致
變及是連荒六年今尤甚間至並村無種鄉農啼怨謂
望食于田反為田而食也方收濕穀石錢二百晚禾多
死間蘇者復出杖子不作穗故今歲之荒並以前數歲
而然也此亦莆澆薄之召然回天活人尚賴當道為力

其通融填補之法往年延建米派納于莆者為市民所攬價多至一兩今第責納七錢則石省三錢納價者利也給軍多祇四錢半見關米浥臭不直三錢今與五錢則給價者利也以其積餘作正每十石可長四石則公之補額又利也莆米價六錢五分亦常事今如其數每十石亦長三石抵莆歲派之數扣補額外尚可增萬四千則公私俱利且以杜攬納之牟取惟倉官難為意使見數支放亦稍利之民所深望者奏免不得已則多派

折色勸災恐軍食之難不敢作八分荒數幸偕二司諸
公告大巡議行捐上益下道在是矧民貧已極幸留之
意至祝

遷定啓

久挹芬菁未由一瞻光霽茲者為弱子遷擇所宜相姓
曰楊宜德曰令仲愛宜卜如于鳳之飛曰吉請命于見
素兄曰嘗聞之型冶諒自有異弟其以媒通焉承報命
曰諾無任慰浣謹洵所納采而脩其定事俗其敢有冀

乎所私幸者王之倚松之附所懸注而待者桃之天冰
之未泮所自意以厚望者葛之覃蝨斯之羽以基有麟
趾振振之盛林前正嗣徽焉菲幣墜入即辰金氣布清
惟自玉以膺休祉萬萬

復胡士寧

先輩李忠定公文集承表揚入梓節義文章甚幸甚幸
序文謬委朱晦翁陳正獻公二序齊七政而參兩儀燭
火醯鷄爭明擬大無過歟然徽烈曠舉義當大書尚容

呈藁原本先僭校奉納更屬賢者複校古所謂校書如
掃落葉傳示萬古未易也字大恐費紙亦須如忠定行
狀大書刻者須擇人庶不虛是集也莆旱極穀二百四
十錢四錢銀矣看數日登場何如漳賊聞四五百劫永
德已近仙界仙巨家已移入莆道聞北敵又橫奈何奈
何折糧似不可已時周尊堂是月十九謝世時周右目
似不可愈又加瘧子消息茫然斗大之屋箭風之地識
者皆謂不可居渠力無能易而心切自信目雖起於憂

時憂母憂子之故亦矮屋熱不可堪而然天於大賢君子大是無意也賜米決辭則喪葬家食何自濟意前奏政章其廉貧非專為養親也謹告不次適又聞永春覆鼎復重被燒劫德化承澤黃廷魁文學家亦被劫且近鄭司徒家矣莆涵頭懲往年之禍亦來城問房幸檄府衛集兵操守及往仙遙振軍威并備長鎗弓弩砲石守城池

答胡侍御

嚮承尊翰厚懷滿紙三復愧慰憲節北指不及走送豈
勝遙勤執事方重為繩糾之翕張其馴鄒賊策無遺運
遠適有餘快崇風素右廉節經紀忠定之遺文惠安之
遺葉時周之遺骸謂今而有是盛斂畏斂畏似聞區區
亦在念中固未敢謂誠然誠然重區區之愧也涼薄世
韻寡諧世味素亦淡方四十五已斂而寂矣五召僅二
以赴以火篩孔棘君相不安于席平藍義在金革且閤
豎恣毒時也然猶足是日西辭疏是日以北繼是念許

月六七陳懔方幸骸骨為雲莊之雲消滅耳矣今加六十有六去謝事僅四年即有所付筋力何由支衰鈍之老尾壯盛英穎之行白洲翁無前監耶且鄉論猶有偽君子之譏海內謬以賤姓名上者或留中或取忤不惟不能出亦不可出矣明於壯而昧於老又忍蹈龜山跡耶未上幸亟中止又聞承致委曲于牌坊之間斯固表律大端前輩循以無改者也區區敢故立異私意有無害無亦無害故三數大巡惠念賤朽與賤子達者皆力

奉辭以今之受異前之辭義無敢以尤厚獨處也飲德則已過矣謹附衷曲望速行罷若謂已致不可反汗微聞張令親達子之惠尚輸郡藏中併以易衆人周一石可四百許實惠與賤父子受惠均也幸垂台照時周今併具乃尊墓為砌石及俟奏立表約須六十之數親知贈儀亦足矣無煩別處附代一謝餘惟吾道寶愛萬萬

復馮郡伯

承諭龍蟹之辯破惑千古直以壺山為郡之望躬走禱

其下為民之心近道者之舉古出禱山川靡神不舉近遣大臣出祀五嶽是意也但京師去五嶽遠此歷歷在望既聚諸神於壇則境內山川皆屬仰叩晨夕有事義有主者輟一日之往固無害遣官代往亦無害蒲山主紫帽與九華壺公皆雲出雨候為常作三告文香燭帛菓酒遣三學官分告輕車裹糧潔虔將事使誠上通而下無所與為擾執事主禱于壇而誠聯屬之一取應法也請擇請擇是時遲且急矣傳君至一甘雨也為執事

得寅賀為民得賢理官賀不具

復陳峰湖

別來無任懸注每取道西湖則扣門看竹浮青澄碧回
翔而後去固欲速主人歸駕以共命煙霞然具諸體者
未大施而食諸家者亦未見其誠裕固未宜數數然以
引去為高也知愛僭論廷佩方伯用世才也區區病其
太淹聞有以江津事容安宇立劾議之江津殺一憲官
縛一憲官內地俱搖而川之勁兵調征藍以盡此時非

此權處可以無蜀不錄其功而媒孽以成其過後日為
國家任事者誰人哉甚矣求人之太深也當其時所慰
意者一廷佩自它高飛遠舉廷佩循故格且後焉以與
無為而立安寧者比其然乎庭荆晚意方屬翁方伯附
勤不謂遽此惠致錫重百朋具見交愛感慰無任人回
書謝餘惟自玉為世道光重不宣

復王陽明

廷言大叅回承致書惠兼審憲紀霜肅道況玉潤漳寇

畢功尋轉而經畧賴之新闢儒為世道賴固然而值今
一遇有餘慨焉執事中立時行運醇鎮躁以大收儒効
少違衲鑿將欲委唾殘棄之其不誠知輕重大丈夫哉
夫假通以行志猶欲強尺枉以望尋之直直不得分而
枉不可反汗孰肯立一恕以庇吾瑕哉腹心之言同道
僭論以嘆世也達子承論及渠材猶可教區區甚難渠
舉之若易惜不立堅苦志玩日愒月竟之無所似適子
文亦異常局學較博然亦欠堅苦負美材執事幸竝下

嚴督之教收之弟子之末道風吹鼓不在門墻間也至
惠至惠餘惟吾道多愛不宣

與張廣漢

承致教翰兼審畿輔肅清優力有湖州經略之寄望實
擇付固然也抑此頑獷之常意同之蘇世浩為類蘇擇
官一撫而自縛以出矧執事之素諒已上畢師之捷矣
近時可慮當不止此擔荷大事海內羣屬非交私諛言
也自愛自愛時周承遠賻感感曹憲副時中定菴華亭

人子良粹永物品時敏公之上文學尤過之今年八十
四細楷草書精絕區區眼中尤與者南臺嘗舉自代撫
臨幸訪其廬遠則延致表異張憲副芝廷毓歛人端靜
好學在大理已有清苦名與如賓東所相類為楊月湖
獨與聞久未克葬恐亦撫下一事歆發廉退須此流人
否則將不可為俗矣蘇州文壁不但學與藝高聞甚有
行實祗奔乃尊太守之喪盡卻祭賻亦人所難區區意
潘南屏惟此生可繼不知然否達廷宣幸嚴督教餘惟

多愛不具

答程侍御

酷熱歷民隱求之昨天旱地震亡命者戢戢然相聚羣
欲肆奪食以執事之方落其魁也自阻是行蓋首賴焉
欲為下郡謝且道愛私以例不入臺附在楮使且具複
瀆表坊不蒙遂已深荷悃顧夫以一事而拜列執事三
數之辱名甚正意甚勤古賢君子受之矣辭誠若過第
前辭後受誠不欲異處也昔關子文之朝不及夕也每

朝王為設脯糗設則逃已則復入謂不欲勤民以自封也今列執事處某無與勤民而某之自處若涉自封故屢以辭請非誠有矯惟諒而許之與拜賜均也地震多且異恐有兵荒之變幸先事為易之圖王道長天宇風采甚佳希道傾注餘惟為道保愛萬萬

答楊邃庵

李亞叅林廷元來兩辱書惠兼審獨樂綠野與造化為朋徒任降位極之勞別一仙人界區區受用此幾二

十年間飯時方起私意仙亦未然疏食水飲無事分樂
天一日當二日尚亞者第未得偕丁卯雲庄之席以話
疇昔缺陷世界也廷元道巾服猶未脫筭謹附見素巾
小深衣奉上所少者小冠與條此易辦也適子記誦筆
下似優其尤然不下著實功夫古文詩亦懶作幸為我
痛斥之阿翁言不足渠信也族弟典有問學有古行三
十五六年官借路費而來此與陳時周頗相類保無變
也欠一進士人不知不具

答鄭少谷

友聲相逐雲龍下上於山連水截之間何幸餘年吾與也仰間价至長書雅調讀且快且媿焉不謂誤愛如許勿更道勿更道譜敘受役有愛哉儲殖庵乃尊壽篇三十年不落筆何椒丘碑文抑縮十五年以久繩引梓人之前與所謂畏蜀如虎者非歟執事尤所畏也然當強副舊譜本附在淵友至覆視不敢落也不敢落也會城孟郡丞乃祖銘先世與子若孫名諱官系欠詳幸屬并

示克相豈城中同輩獨少閩亦無之若天假館職決平
視篁墩圭峰而過幸道堅定適子承念感感瘡未全脫
去學亦落固精神不逮亦無志遠大然也寶惠反壁拙
詩近山齋選數篇執事幸敘為重朔日城中水敗數百
家區區心力盡始祖邵州公忠烈祠去且半懷抱欠清
河魚坐苦書欠備情照

寄楊月湖

久不奉教言吾人例去形迹林居無害自晦執事亦爾

疎斷似未宜達子書常道愛念亦豈懶筆研然耶近聞甚異伏枕鳴邑對妻子不能言亦不敢言固知悟徃易若轉丸及自有默相顯護之妙然亦憂墜之所過計也執事士夫之觀慎重達子幸教之窮理盡性養靜力行鎮雅而視官如無守義而視身如棄通圓巧宦吾道之所無取也百年流弊養士收用庶在此餘惟保愛萬萬

答王天宇

月之下旬二日一野人傳致執事書者問之茫不能對

啓緘知發自崇安歸驂諒已決矣東巡臺望聳聽而服
深嫉嚇腐之梟鷂遡高翔之鴻鵠持是而往而荷重而
歛之寂如鳥鳴春雷鳴夏虫鳴秋冬而以風鳴無入不
自得矣和杜心聲兼到近毛汝礪寄至數十首亦良是
來賢誠可畏矣古者任天下之重心為之主而學以副
之區區竊是心者而學則不逮則固委吾分所當以畢
吾志來諭謂不能忘世而亦不必用世此懷仁揆智大
人君子之事非區區之所得當亦欲執事之所終副也

事固有可為有不易為者自愛自愛毋讓毋讓時周荷
勤繼吾道盛舉然渠地所非人所居無獨一草屋短陋
已也力不能遷士夫羣強之且議助之卒不可竟之宗
祊弗嗣後之者孤孱一脉再一誤則若教氏之鬼不食
豈不哀哉僭為之處書附伍方伯想到矣即未然當附
奉見吾人是心執事即發閩亦或有所終惠也楊李二
司空白齋幸致意楊司寇未及致奠幸唁其子餘惟吾
道多愛萬萬

啓泉山翁

嚮歲碧卿近德卿希韶三姻契回疊承詩帋異魚及利
瞻登科錄盛惠兼審令孫炫亦省祖而至一門樂事誰
及之首春道况清佳夫以望九之年應泛周旋禮意勤
懶至簡答題封亦自手出天厚元老精神福祉超絕一
世黃職方鞏又一時周鄉國後賢可畏也學步數詩具
別柬小帋為春官新還之賀餘惟頤養天和為後學型
治是望

答劉德夫提學

陳石峰乃弟玉光來承轉致戴長壽白齋書且謂執事
若有疑書問之簡者區區山中人也在位率無書要地
尤斬斬以絕間一致執事趣尚同也格當如此執事書
來山中何嫌白齋傳稿附上教正渠書幸屬的當人寄
上視到恐遺落也得回書尤幸吳匏庵集羅圭峰全集
有重本幸惠從學族弟與其姪守仁皆吾道中人可與
者餘不具

答二泉

忠烈碑銘已登石惜甫僻一隅無善書者刻者摹印者
奉呈增愧容春堂集盡讀快幸今而後知作家有人惜
衰頹無鞭策處耳如命作序殊見卑弱覆瓿耳矣山齋
所選拙詩達子奉呈未未呈令鄭文學為取上痛去而
十一存之浦友來賢可畏愛藉聲意勤次小江贈蒲屨
二詩奉笑不一一

寄毛汝礪

承大作瀟卷既又累長絳達子聯舟備道養充學進風
操愈以白憲節方重山立不移持是以往信暮靄朝嵐
銷滅之世觀惠賴例不作書賢者禮宜殊謹此布謝并
附數詩陳時周已古人繼之者黃伯固林汝敷林孚可
皆一流人恐欲知餘惟多愛不具

與蔡我齋

久不相見執事古道自處人急我緩人取我卻固可窺
其隱矣茲者拳拳舊典之復孰敢有非者然事壞易而

救難革之道當革也必已日乃孚革而信又革而當其
悔乃亡其固未易爾矣執事先求之我使上下相安俟
時而革固相期以此運天下非獨一學校禮節間也朔
日決須一出馮公頗吾人氣味居今求人以全難容面
既不具

答孫德成

承惠何文肅公碑書刻與材精絕加以亭使文肅自辦
計無逮此一事而大可該也幽明有餘慰矣喜幸連日

感感謝謝惜謏劣無足以發如盲繪天文肅無已之榮
俊無已之愧也諡始得之乃孫之書今篆入碑首倘未
具依此補之已具祇於空處細刻畧云公尋諡文肅碑
已製書闕謹補數語如何題名之委江藩多巡視後始
專巡撫故僭易題額幸尊裁并拙文竄定碑石信州稍
可然材與書與刻俱不逮蘇刻完幸同文肅公碑致數
本至祝

與馮行健

數進士來訪謂執事慨然復坐講甚善惟跪謂近時通行若在分名不在跪不跪重輕間也區區出學久廢坐講增府揖增跪禮均不知出何時數進士謂故不見跪禮方思源離學纔二年則起自余為近白齋處學校過和不應起跪禮則有所求為近當其時僚友爭之諸生賤惡之則可復為近執事古道自將誠不在跪不跪恐未有以余事告者未了也且蔡郡博一泥古不通士然避要任散亦世所難是惟容之為上光武處一大以

遂子陵之高越石父請絕晏嬰禮為上客范宣子讓其
下皆讓成人固成已也謹用奉告幸示厚處萬萬

與席方伯

蔡宗充樂道甘貧外物無足介其意璞玉渾金祥瑞
日將暮程伯子之和以藏叔子之介自閨門以至酬物
無一不足人師莆士無福為異已所中當道誤聽輕處
之義在必去誰復能留其所以調幹遲滯使托校文為
臺察地也又深文繩之過矣過矣賢者為我而去已大

不幸而前後所歷五月之俸僅支一月齋夫僅支四兩諸生叅補節儀分毫無干此在吾輩均之未能且家貧何恃能去而和粹從容有問即引過無纖毫尤人及不豫之色此非素養純深其能至此哉以故人心益服敬之慕之得其題跋數字為榮村落小夫求識面以去例以一郡而天下後世之公可推歸獄將有在矣聞疑士夫右之夫附要同情孰肯羣然右去位之一教且諸生屬歲監臨獨無思及此與執事名古意又首二司幸力


調幹勿使惜今日如惜偽學時也區區首在疑列猶刺
刺無避斯文扶衰不吾人誰耶且當道有世講氣定之
悔將終身予德不然將自幸與黨籍之榮蓋齒資俱長
諸士先屬將何謝耶列位同此山中無書缺不別具

與馮郡伯

今年痘疹甚慘承禍亦大作臘月迅雷已乃雪春正月
至十一月後多陰晦恒雨恒雷水溢田麥菜無望高者
亦甚欠熟雷二月發聲臘月正月為失時為陽氣不固

恒為政治不一之象且雷陽也雪陰也既雷則不當雪
皆失節之故恒雨為狂之罰與陰晦不解皆為陰盛侮
陽下謀上餘亂未解之証夫人心天地之心怒則震雷
甚雨喜則和風麗日執事廉剛果斷是為陽明之象僚
屬亦無甚疵政不謂之陰豈咎不在此在彼歟然不幸
此地見之竊意行屬修省以祈晴朗及間有如致旱隕
霜之漸亦運幹其間人心悅則天意順倘謙讓無力幸
托今大巡公救解則今日所運用之一郡者固一面之

寄臺省之峻烈也會中容面不具



見素集卷二十二